



საქართველოს პრემიერ-მინისტრის

ბ რ ძ ა ნ ე ბ ა

N 233 2016 წლის 2 აგვისტო ქ. თბილისი


საქართველოს მთავრობის ადმინისტრაციის სტრატეგიული პროექტების კოორდინაციის დეპარტამენტის დებულების დამტკიცების თაობაზე

1. „საქართველოს მთავრობის ადმინისტრაციის დებულების დამტკიცების თაობაზე“ საქართველოს მთავრობის 2014 წლის 19 ნოემბრის №626 დადგენილებით დამტკიცებული დებულების მე-4 მუხლის მე-3 პუნქტის „ბ“ ქვეპუნქტის შესაბამისად, დამტკიცდეს საქართველოს მთავრობის ადმინისტრაციის სტრატეგიული პროექტების კოორდინაციის დეპარტამენტის თანდართული დებულება.

2. საქართველოს ზოგადი ადმინისტრაციული კოდექსის 61-ე მუხლის საფუძველზე, ძალადაკარგულად გამოცხადდეს „საქართველოს მთავრობის ადმინისტრაციის რეგიონებსა და ადგილობრივი თვითმმართველობის ორგანოებთან ურთიერთობების დეპარტამენტის დებულების დამტკიცების თაობაზე“ საქართველოს პრემიერ-მინისტრის 2015 წლის 2 დეკემბრის №486 ბრძანება.

3. ბრძანება ძალაშია 2016 წლის 16 ივლისიდან.

გიორგი კვირიკაშვილი



დამტკიცებულია
საქართველოს პრემიერ-მინისტრის

2016 წლის 2 აგვისტოს

№ 233 ბრძანებით



საქართველოს მთავრობის ადმინისტრაციის სტრატეგიული პროექტების კოორდინაციის დეპარტამენტის დებულება

მუხლი 1. ზოგადი დებულებანი

1. სტრატეგიული პროექტების კოორდინაციის დეპარტამენტი (შემდგომში – დეპარტამენტი) არის საქართველოს მთავრობის ადმინისტრაციის სტრუქტურული ერთეული, რომელიც თავისი საქმიანობისას ხელმძღვანელობს საქართველოს კონსტიტუციით, „საქართველოს მთავრობის სტრუქტურის, უფლებამოსილებისა და საქმიანობის წესის შესახებ“ საქართველოს კანონით, სხვა კანონებით, საქართველოს მთავრობის დადგენილებებითა და განკარგულებებით, საქართველოს სხვა შესაბამისი სამართლებრივი აქტებით, საქართველოს მთავრობის ადმინისტრაციის დებულებითა და ამ დებულებით.

2. დეპარტამენტის ფუნქციები, სტრუქტურა და უფლებამოსილებები განისაზღვრება საქართველოს მთავრობის ადმინისტრაციის დებულებითა და ამ დებულებით, რომელსაც დადგენილი წესით ამტკიცებს საქართველოს პრემიერ-მინისტრი.

3. დაკისრებულ ფუნქციათა განსახორციელებლად დეპარტამენტი, თავისი კომპეტენციის ფარგლებში, თანამშრომლობს აღმასრულებელი ხელისუფლების დაწესებულებებთან, ადგილობრივი თვითმმართველობის ორგანოებთან და სახელმწიფო რწმუნებულებთან-გუბერნატორებთან და მათ ადმინისტრაციასთან, სხვა უწყებებსა და ორგანიზაციებთან.

მუხლი 2. დეპარტამენტის ფუნქციები და ამოცანები

დეპარტამენტის ფუნქციები და ამოცანებია:

ა) ქვეყნის სოციალურ-ეკონომიკური განვითარების სტრატეგიიდან და მისი მიზნებიდან გამომდინარე რეგიონული და ადგილობრივი განვითარების ხელშეწყობა;

ბ) სტრატეგიული პროექტების უწყებათაშორისი კოორდინაცია, რომლებიც ფუნქციონალური და სტრატეგიული თვალსაზრისით გავლენას ახდენს ქვეყნის ეკონომიკაზე, ტერიტორიულ-სივრცით მოწყობაზე, გარემოსა და ბუნებრივ რესურსებზე და სხვა;

გ) სახელმწიფო/ავტონომიური რესპუბლიკის/ადგილობრივი თვითმმართველობის ბიუჯეტის დაფინანსებით მიმდინარე/განსახორციელებელი სტრატეგიული (ინფრასტრუქტურული) პროექტების განხორციელების ხელშეწყობა;

დ) სახელმწიფო უწყებების მიერ დაგეგმილი/მიმდინარე სტრატეგიული პროექტებისა და პროგრამების რეგიონულ და მუნიციპალურ დონეზე კოორდინაცია;

ე) რეგიონებში მნიშვნელოვანი სტრატეგიული პროექტების განხორციელების მიზნით სახელმწიფო, რეგიონალურ და ადგილობრივ სტრუქტურებთან/ორგანოებთან თანამშრომლობა და მათი განხორციელების ერთიანი სახელმწიფო პოლიტიკის ხელშეწყობა;

ვ) კომპეტენციის ფარგლებში ადგილობრივი თვითმმართველობის ორგანოებისა და სახელმწიფო რწმუნებულის - გუბერნატორის სახელმწიფოს ცენტრალური ხელისუფლების ორგანოებთან კოორდინაციის უზრუნველყოფა;

ზ) მთის განვითარების ეროვნული საბჭოს საქმიანობაში მონაწილეობა და აღნიშნულ საქმიანობაში სახელმწიფო რწმუნებულების - გუბერნატორების ეფექტური კოორდინაციის ხელშეწყობა;

თ) კომპეტენციის ფარგლებში, სახელმწიფო რწმუნებულების-გუბერნატორებისა და ადგილობრივი თვითმმართველობის ორგანოების საქმიანობიდან გამომდინარე, მათ მიერ შესასრულებლად გამოცემული საქართველოს კანონებისა და ნორმატიული აქტების აღსრულების კოორდინაცია და კონტროლის ხელშეწყობა;

ი) რეგიონებსა და ადგილობრივ თვითმმართველ ერთეულებში სტრატეგიულ პროექტებთან დაკავშირებით არსებულ პრობლემურ საკითხებზე დეპარტამენტში შემოსული ინფორმაციის დამუშავება-ანალიზი;

კ) დაკისრებულ ფუნქციათა განსახორციელებლად, ცენტრალური, რეგიონული და ადგილობრივი თვითმმართველობის ორგანოებიდან, საჭიროების შემთხვევაში, ინფორმაციის გამოთხოვა-ანალიზი და წინადადებების მომზადება;

ლ) კომპეტენციის ფარგლებში ერთიანი მონაცემთა ბაზის ფორმირება;

მ) კომპეტენციის ფარგლებში რეგიონალური და მუნიციპალური სერვისების დანერგვა/სრულყოფის კოორდინაცია;

ნ) სოციალურ-ეკონომიკური განვითარების პრიორიტეტების განსაზღვრის პროცესში მონაწილეობა და მათ განსახორციელებლად სტრატეგიული გეგმების შემუშავებაში ჩართულობა;

ო) სტრატეგიული პროექტების განვითარების კუთხით საზღვარგარეთის ქვეყნებთან, საერთაშორისო და არასამთავრობო ორგანიზაციებთან საქართველოს მთავრობისა და საქართველოს პრემიერ-მინისტრის თანამშრომლობის ხელშეწყობა;

პ) დეპარტამენტის კომპეტენციას მიკუთვნებულ საკითხებზე მთავრობის გადაწყვეტილებათა განხორციელების ხელშეწყობა;

ჟ) დეპარტამენტში შემოსული კორესპონდენციის განხილვა;

რ) საქართველოს კანონმდებლობით განსაზღვრული სხვა უფლებამოსილებანი.

მუხლი 3. დეპარტამენტის ხელმძღვანელობა

1. დეპარტამენტს ხელმძღვანელობს დეპარტამენტის უფროსი, რომელსაც თანამდებობაზე ნიშნავს და თანამდებობიდან ათავისუფლებს საქართველოს პრემიერ-მინისტრი.

2. დეპარტამენტის უფროსი:

ა) საქართველოს მთავრობის ადმინისტრაციის, ამ დებულებისა და საქართველოს პრემიერ-მინისტრის დავალებების შესაბამისად უზრუნველყოფს დეპარტამენტის საქმიანობას, პასუხისმგებელია საქართველოს

პრემიერ-მინისტრის წინაშე დაკისრებული მოვალეობების ჯეროვანი შესრულებისათვის;

ბ) ანაწილებს სამსახურებრივ დოკუმენტაციას დეპარტამენტის შესაბამის სტრუქტურულ ქვედანაყოფებს შორის და უზრუნველყოფს მათი საქმიანობის კოორდინაციას;

გ) დადგენილი წესით განსაზღვრავს დეპარტამენტის თანამშრომელთა ფუნქციურ მოვალეობებსა და უფლებამოსილებებს;

დ) ხელმძღვანელობს დეპარტამენტის მიმდინარე საქმიანობას;

ე) კანონმდებლობით დადგენილი წესით უზრუნველყოფს დეპარტამენტის თანამშრომელთა საქმიანობის სამსახურებრივ ზედამხედველობას;

ვ) საქართველოს პრემიერ-მინისტრს დასანიშნად წარუდგენს დეპარტამენტის თანამშრომელთა კანდიდატურებს;

ზ) ამზადებს წინადადებებს დეპარტამენტის თანამშრომელთა წახალისებისა და დისციპლინური პასუხისმგებლობის დაკისრების შესახებ;

თ) ხელმოწერით ადასტურებს დეპარტამენტიდან გასულ დოკუმენტებსა და სხვა მასალებს;

ი) წარმოადგენს დეპარტამენტს სხვა სახელმწიფო დაწესებულებებთან ურთიერთობისას;

კ) შეიმუშავებს დეპარტამენტის დებულებისა და საშტატო ნუსხის პროექტს საქართველოს პრემიერ-მინისტრისათვის წარსადგენად;

ლ) ახორციელებს კანონმდებლობით მინიჭებულ სხვა უფლებამოსილებებს.

3. დეპარტამენტის უფროსს ჰყავს მოადგილე, რომელსაც თანამდებობაზე ნიშნავს და თანამდებობიდან ათავისუფლებს საქართველოს პრემიერ-მინისტრი.

მუხლი 4. დეპარტამენტის სტრუქტურა და სტრუქტურული ქვედანაყოფების ხელმძღვანელობა

1. დეპარტამენტის სტრუქტურული ქვედანაყოფებია:

ა) რეგიონებსა და ადგილობრივი თვითმმართველობის ორგანოებთან ურთიერთობების სამსახური;

ბ) პროექტების კოორდინაციის სამსახური;

გ) საინფორმაციო-ანალიტიკური სამსახური.

2. სტრუქტურულ ქვედანაყოფს ხელმძღვანელობს სტრუქტურული ქვედანაყოფის უფროსი, რომელსაც დეპარტამენტის უფროსის წარდგინებით თანამდებობაზე ნიშნავს და თანამდებობიდან ათავისუფლებს საქართველოს პრემიერ-მინისტრი.

3. სტრუქტურული ქვედანაყოფის უფროსი:

ა) ორგანიზებას უწევს სტრუქტურულ ქვედანაყოფში შემავალი საჯარო მოსამსახურეების საქმიანობას;

ბ) ანაწილებს სამსახურებრივ დოკუმენტაციას საჯარო მოსამსახურეთა შორის;

გ) უშუალოდ ამზადებს განსაკუთრებული სირთულის მქონე ცალკეულ დავალებას;

დ) წარუდგენს დეპარტამენტის უფროსს ინფორმაციას სტრუქტურული ქვედანაყოფების თანამშრომლების მიერ მიმდინარე და გაწეული საქმიანობის შესახებ;

ე) ახორციელებს კანონმდებლობით მინიჭებულ სხვა უფლებამოსილებებს.

მუხლი 5. დეპარტამენტის თანამშრომლები

დეპარტამენტის თანამშრომლები არიან საჯარო მოსამსახურეები, რომლებსაც, კანონმდებლობით დადგენილი წესით, თანამდებობაზე ნიშნავს და თანამდებობიდან ათავისუფლებს საქართველოს პრემიერ-მინისტრი.